

Acuerdo riba destinacion 16 miyon placa FDA



ORANJESTAD – Hulanda y Aruba a yega un acuerdo riba e destinacion di e resto di placa den e Fondo Desaroyo Aruba (FDA). E suma cu a resta ta 16 miyon florin.

Aruba lo bay uza esaki riba termino cortico, asina gobierno ta bisa. Nan ta hinca esaki den caminda y demas infraestructura, afecta pa e mal tempo na november 2016.

Manera Bon Dia Aruba a skirbi comerciantenan den Playa ta hopi preocupa y urgi pa gobierno inverti entre otro den un miho sistema di riool. Otro parti di e placa gobierno lo hinca den bon gobernacion, desaroyo sostenibel, mantencion di ley, enseñansa y proteccion di naturalesa. E placa pa proteccion di naturalesa ta principalmente destina pa proteha e rifnan di coral. Esaki ta hopi necesario

como cu nos rifnan den un hopi mal estado cu manera nos tambe a skirbi caba, aki 10 aña nan tur ta perdi cu consecuencia grandi pa nos lama.

Prome minister Mike Eman ta na Hulanda awor. Riba potret por mira e mandatario cu e minister di Asuntonan Interior y di Reino, Ronald Plasterk.

Historia di e fondo

Den cuadro di e relacionnan di cooperacion nobo entre Aruba y Hulanda, den e periodo di 2000 y 2016 a ehecuta seis programa di varios aña na Aruba. Ambos pais a hinca placa den e fondo di desaroyo aki. FDA den e periodo aki a financia 763 proyecto cu un balor total di 500 miyon florin, dividi den e sectornan: calidad di gobernacion, salubridad, desaroyo economico duradero, mantencion di ley y Producto Aruba. Fin di september ta drenta e pago final di Fondo Desaroyo Aruba, asina gobierno ta informa.